

# Grienschnäbel



2011



Dr Phaapscht erloot e Gsetz in Rom mir gseen das nit rächt y,  
s Condom fir lychti Fraue sell nimm verbotte sy.  
Jetzt waiss me nit genau, dass duet är nit vermälde  
ob das bis 50 oder 80 Kilo solli gälte.

Si faare kai Ferrari und au kai Trotinet,  
sin kaini Buusewunder, villicht no guet im Bett.  
Gwaliteet und Gwantiteet machets aber uus,  
drum hän mir jetzt vier Fraue in unsrem Bundeshuus.

Unsre neye Fäärnseeboss luegt immer so verbisse,  
trotz De Weck isch s ganz Brogramm no immer glich verschisse,  
als Ehrerettig mechte mir, und das isch uns ganz wichtig  
Ihn e bitz in Schutz näh denn, sälber g seet är s richtig.

Soldat Müller	Hier
Soldat Meier	Hier
Stillgestanden .....	Gewehr ab

Nur so deens bim Millitär, e jede muess barriere,  
mit em schwääre Kampfaazug im Giät go maschiere.  
Lut Murer winscht sich jedi Frau, e Soldat als Maa,  
will dä dehai halt besser Bifääl uusfiere ka.

Unsri Mamme wett so gäärn in Bäärn go kandidiere,  
will dr Wääg vo Widmer-Schlumpf nimm wird wyter fiere,  
si isch jetzt eigendlig scho wyt, mit em ganze blaane  
nur die kaibe schyssh Frisur griegt si noonig aane.

Wäg de Falte dien is d Männer ständig kritisiere,  
drumm hän mir soone Falte-Gräame welle uusbrobiere,  
s uffdraage vo däre Baschte das isch grad soo gange,  
doch bim glette stoot das Hemmli, bletzlich no in Flamme.

E huffe Männer in dem Land, eergere sich schuurig.  
4 Fraue in dem Bundesroot das isch doch himmeltruurig,  
denn mit dr Friise und dr Stimm das geert doch au erwäänt  
isch Calmy Rey doch vom e Maa nit soo wyt entfäärnt.

Als Uusred hänn mir gsait, Schatz hyt han ich Kopfwee  
und jetzte lauft jo gar nyt mee trotz neyem Neglische.  
Nach em Guetnacht-kuss keert är mir dr Rugge  
und duet denn ganz Gail, uff sym „iPhone“ ummedrugge.

Im neye Gsetz stoo jetzt, dass d Waffe derfsch b halte  
und will si nit dehai ha, duet s Zyyghuus die verwalte  
und hesch dehai e beese Maa und nit e soone zaame  
denn bringsch en halt verglaidet als Haubitz au deert aane.

E Glygge kunnt vo rächts, e Schääse faart verby,  
e Gugge spiilt e Ständeli, do z Baasel am mym Ryy.  
E Waggis schreit „wo hesch Blagette“, au Bängg sind unterwägs,  
s Chaos isch do fascht perfäggt aber zämme fägts.

---

Wottsch au by uns bänggle ?  
Schigg doch aifach e Brief in unser Boschtfach  
VSG Postfach 4365 4002 Basel  
Oder goosch uff, [www.vsg-basel.ch](http://www.vsg-basel.ch)

---